

## Von der vorsuchunge der vortzweifelung.

**W**ider die vorsuchunge der vortzweifelung  
gibt der engel ein gute lere sprechende O mē-  
sche wurumb vortzweifelstu vñ hettestu ges-  
tan so vil mozt so vil dipstal so vil manschlacht. als  
tropffen vñnd sendelein des meres. dar zu die sund  
aller menschen vñd ob sie dich noch nie gerawet od̄  
gebeichtet hettest. vñd itzund vor fräckheit nit mocht-  
test beichten. dannoch saltu nicht vortzagen. wen an  
sollichen enden ist die inwendige rawe des hertze ge-  
nugsam als im psalmen Das gerawet vñ gedemur-  
tiget hertze herre got wirstu nicht vorschmahē Und  
ezechiel spricht. In welcher stund d̄ sunder ersuffzet  
so wirt der sunder behalten. Und Bernhardus. Got-  
tes güttigkeit ist grosser dan alle sunde. Und Augu-  
stinus got mag mer barmhertzig sein wen der mēsch  
gesunden mag. vñd ob du wiffeste das du von der  
zal werest der vorthumpen dannoch saltu in keines  
weg vortzweifelen. Wan durch vortzweifelung ges-  
chicht nit mer. wan das der aller gutigeste got noch  
meher wirt ertzurnet vñnd die andern sund mit der  
peyn krefftiglicher beschwert werdenn Szo ist ouch  
christus vor die sunder gecreuziget worden vñd nit  
für die gerechtē als er selbes bezeiget sprechend Ich  
bin kommen den sundern vñnd nit den gerechtē  
Nim ein beyspil in petro. der gottes vorlognet. In  
paulo dem vorachter der kirchenn. Matheo vñnd  
zacheo den offenbar sundern: Maria magdalenen  
Im frewelei dz in dez eebuch begriffē ward bey dez  
schacher an dem creutz vñd andern vil grosse sund.